

新俄羅斯遊記



序一

歲癸亥李道尹香齋奉使如蘇俄參觀其農業博覽會閒
以其暇游歷波蘭德法三國於共產佳兵之害旣目覩而
神傷矣箸爲日記以問序於余余謂彊梁者不得其死柱
下之言不誣也俄德法皆一世之雄曾幾何時德之國瀕
於亡法之民日以減而波蘭乃光復其舊物也彼蘇俄者
倡行共產世之人所目爲洪水猛獸者也而自改之不旋
踵於知凡非生人之行而至死人之理者噲如湍水之不
久激暴雨之不終朝夫共產之不適經濟家昔已深斥之
蘇俄悍然而行又以國人皆弗願不得不改絃而更張焉

此在開化較晚之邦不能行已若是矧其在歷史最長大道惟公之中國何則天地之道因材而篤演化之程易時則異是以毋追不習於裸國疏越不奏於巴渝人有恆言曰玉卮無當雖寶非用况夫兕觥又非玉也共產之於人豈惟不若兕觥哉假名於公奪人之有恣睢者數夫罹害者萬衆所謂姦雄結軌於千里蒸民塗炭於九隅者蓋惟此爲然夫大德曰生因民所利我國以爲政本也亦久矣帝王質文世有損益及糾察其統古今皆以之源導也夏之政行殷之政善周之政至行政未必善善政未必至也日以向上人之性夫豈有入幽谷而下喬木者淮南書曰

至至之人不慕乎行不慚乎善神皋之國炎黃之胄繼自
今其愈至可知百世無惑耳洋洋乎九功之歌以利用厚
生者豈徒哉民生有欲不得則爭倉廩實而知禮節衣食
足而知榮辱下令所以若流水之源也古之人禮節民心
樂和民聲政以行之刑以防之猶未能無怨不爭也蓋務
蓋藏長子孫者人之情若變相沿之有而聚之於國竭勤
動之得而收之於官以爲法式以此責人是不愛人以此
自行固不愛己其道太穀其究難爲反天下之心天下不
堪宜其不能終行也卽以無道強迫而行則非惰逸卽鋌
險耳惰逸則乾坤或幾乎息矣鋌險則國家何賴焉且公

田者封建之迹也自周衰至今三千有餘歲彼去封建近
逆而反之已背自然不能行而謂遠者而能之乎易曰無
平不陂無往不復艱貞无咎勿恤其孚于食有福夫何須
贅恤而杞憂耶香齋日記於此頗齷齪因揭明其故爲之
序而歸之世之人庶亦將有昭也

民國十三年歲次甲子二月代理奉天省長王永江序

蘇聯立國叛古今中外未有之局舉從前各種政體廓而
除之非往實地視察豈易窺其實際然其人非學識素裕
眩於一時外有之象見地不能無偏亦豈足據乎吾友
李君香齋去秋捧檄赴蘇聯首都參預農業博覽會余聞
之甚喜蓋深知其才器通達考查所得必能信於國人識
足以濟之也及冬而歸眎余此編讀至蘇聯政治組織數
章以如此蹊駁之原理寫以明快之筆不一評判而彼中
真相已顯豁呈露尤爲難得夫俄廷之箝制其民爲彼羅
馬諾夫皇室傳世之策壓力之反動必超過於受壓之量
物理所同五六年來彼邦思潮乃如丸走坂愈趨愈急終

薪向於平民獨裁摧陷貴族資本家之蹤影而後已勢固然耳若云此制之良惡可無論也國無不敝之政世無無弊之法往古聖哲創制猶申誡之曰窮變則通矧蘇聯此制卽云適合俄今時勢安知異時彼之民族思潮不又轉換而別有所謂適宜者存乎李君此編述彼政體比量同異良云賅洽而獨於其得失優劣悉屏不書洵乎能識其體要者夫

瀋陽王樹翰序

題辭

一士讀萬卷書須行萬里路識量拘於墟門戶不出故卓
卓香齋君昭晰洞時務林業富考察往歲東瀛渡所得
非不多意猶不自足北游恣參覽西上程兼赴歸輪勒
成書一一相告訴展卷資臥遊心目爲交注

二許行並耕談子輿所痛詈奈何數千年復有師其意未
讀亞聖書惡知治人義擾擾苦不寧改進費人事溯從
洪荒來立國於天地高卑貴賤殊天然有定位乃比而
同之滑稽笑遊戲過激亦何爲此義世所棄

斥共產

三上帝好生德視物靡彼此胡爲悖之行胥欲置諸死恃

爾物質精世界罕儔比恃爾軍律明下令如流水萬化
根人心恃者不可恃崇朝勢潰決戰勝乃公理古聖重
畏天元首天之子所事與天違蒼蒼不佑爾傷好戰

四芸芸天壤蕃有人此有國生齒聚日滋終古未有極謬
種遽流傳斬然肆戕賊霜嚴萬卉枯月黑天容墨忍自
絕其機榛莽壅否塞大德曰生生今乃故抑勒不亟豁
其蒙乾坤幾乎息荒謬真絕倫我聞心慘惻哀避姪

五三戶可亡秦有剝終有復河清豈難俟惟自視人壽古
人重興繼滅絕肯成就我不爲之夭困獸猶能鬥大網
自恢恢疏而弗虞漏勿曰弱可殘藐茲神明胄氣象煥

然新邦名仍如舊興亡反覆間公理存宇宙

許獨立

遼陽袁金鎧

自序

余去秋歸自歐洲同人爭以海外風俗政教爲問語未能
詳心滋疚焉先是蘇維埃新國肇造特開農業博覽會於
莫斯科用新觀聽各國多遣派代表往預斯會余奉大府
之使命俾往參觀所以聯邦交資借鏡甚盛事也至時開
會延期旅居無賴爰作柏林巴黎暨波蘭之游足跡歷四
國不無見聞顧程期迫促道途修阻以短淺之眼光作急
遽之觀察凡所攷詢徒賴舌人所得亦僅獨念歐戰旣罷
舉戰勝國之發展與失敗者之補救在在與我國有關矧
蘇俄毗連東省利害關係尤爲密切有心時局者方且搜

羅譯編藉覘真相而謂親歷其境者可無毫末之貢獻乎
故不揣譾陋就途中日記參以臆說付諸手民固知腦力
薄弱不能道其萬一所願邦人君子不吝教誨繩繆糾愆
豈惟鄙人之幸抑從來紀游之作往往侈談風景鋪叙山
川茲編概從簡略以余職在行人所紀應有重於此者是
則區區之微意也

中華民國十三年一月 法庫李友蘭自識於洮昌道署

新俄羅斯游記

赴俄之使命

歐洲大戰之後馬克斯學說盛行全球勞動階級漸佔勢力各國政府明知潮流所趨不可遏抑思所以疏導之俾就正當之軌道故組織工黨內閣者有之專設勞動部者有之特立勞動局者有之（我國內務部擬設勞動司）公定國際勞動時間改正工場管理規則一以限制資本家之暴橫一以保護勞動家之安全大有岌岌不遑急起直追之勢誠以勞動問題爲今日人道主義上最重大最緊要之務也夫世界中著名專制之國厥維俄羅斯惟其專制愈甚而革命黨愈多即物理學所謂壓力愈大抵抗力亦愈強也故俄國民人十有七八抱有革命思想者前仆後起斷送生命不可計數迨

西歷一千九百十七年三月九月兩次革命風發泉湧傾覆帝制揭櫫兵工農（又稱勞農）社會主義建設蘇維埃（委員制之義）共和政府於莫斯科六七年來漸次統一全俄蘇維埃聯邦共和國基礎於以大定此絕大事業成功若是之速遂引起全世界之注意莫不急欲一覘其真相然俄國革命以來爲一種經濟政策與外國斷絕通商各國雖非常注意而調查不易僅有冒險者藉種種手段游歷其國偵察所得不過片面一部分而已（如日本川上俊彥之勞農俄國我國江亢虎之新俄游記等）余思俄國與我壤地相連政體相同攜手之日當亦不遠苟不明其國情交涉無從措手况我東三省首當其衝久欲游歷其國而苦無機會乃於七月二十三日接史署長曜五（交涉署長名紀常）電話告知張總司令及王省長徇俄代表越飛氏秘書達夫欽之請派余赴俄國莫斯科京城爲東三省代表參觀農業博覽會竊幸藉此機會可達

考察新俄政治之目的即日謁見張總司令及王省長面奉使俄之命因開會期爲八月十五日須於二三日內起程方可及期趕到繙譯隨員由余自聘旋即匆促治裝料理一切余思小兒希珍赴德留學定於下月首途年幼無知初次出洋應代爲籌備又小女葆淑亦於下月于歸賀氏又新營省城之寓所圖樣將竣下月可以投標動工個人私事正虞蝟集何能遠涉異國然一則重以上峯之命一則藉償考察之願遂將個人私事置而不顧即在省城延英文譯員王辛南君（名偉奉天工業學校英文教員）惟俄文譯員甚難其人後蒙于總辦雲章函請東路董事袁君潔珊由哈代爲延聘旋即回至安東將採木公司職務派李課長華亭代理二十六日赴省謁張總司令及王省長請訓告辭二十七日晨六時乘南滿鐵路火車起程午間抵長春吉林督軍行署在焉爲南滿路吉長路中東路之交點故在此換車余下車往謁孫督軍告以赴俄之

便命午後換乘中東路火車赴哈爾濱

哈爾濱

四

二十八日晨抵哈爾濱下榻於新世界旅館旋往謁袁董事潔珊詢知俄文譯員承其代爲聘定關賓如君（名鴻翼瀋陽人哈埠俄國商業學校畢業現充東路公司監察局稽核員哈爾濱市董事會議員）即在袁君處晤面商量赴俄之一切手續旋即往謁哈埠特別區朱子樵長官及蔡品三道尹即請蔡道尹通知駐哈蘇俄代表並約定往訪之期二十九日王辛南君亦到本日適星期日同陳止中廳長袁潔珊董事蔡品三道尹游覽馬蓋卿（名忠駿現任市政局長）之別業距其馬家溝寓所約五六里地方幽僻別闢異境中建精舍三四楹額曰晚稼軒室內精潔整齊窗外桑麻鋪菜蔬菜滿畦前面馬君之生壙在焉於此繁華地中別饒林泉之趣爲心曠神怡流連不置三